

GALESIA

Kiyang wê Pol kivuu vô tibii Galesia ge

1 ¹A, Pol, a sinale ti, léc xomxo ti o vinoo a nêb a kô yuac sinale lêm, di xomxo ti o vông a lam vac yuac tiga lêm. Nge, Yesu Kilisi yuu Ma Anutu wê tipî vô Yesu kidi lec vac yibên ge, yucyuu va vinoo a nêb a vông yuac sinale. ²Om a hixôn lige wê dô hixôn a ge, xe kivuu kipihac tiga di vông i loc vô xam vông vinên vac konglegesen toto wê yêp vac vigwe levac Galesia ge.

³Xêyaa vin lecên yuu kiyang malehe wê Mag Anutu yuu il lig Apumtau Yesu Kilisi vông ge i viac xam. ⁴Kilisi timu vô môm wê il Mag Anutu nêb i vông ge, om lam yib lec il nêd nipaên ên nêb ob vô il vêl ên môm nipaên kibun ga wê xomxo dô vac ge. ⁵Mêgem il ob pimil Anutu lê i vô levac di i yêp luta léc luta. Nôn.

Kilisi xolac ge tived

⁶Xame, a yetac mabu ên môm wê xam vông ge. Ên Anutu tyuc xam nêb xam tu i nue lec vizid wê Kilisi vông ge om xam vông i vin, léc lutibed xam sea Anutu di la vac xolac bangwe. ⁷Vixôhilôg, Yesu xolac tived ge wê nôn, di kiyang baba ge o xolac nôn lêm. Léc a nêl kiyang tige ên wê xomxo ya nêb ob pilepac Kilisi xolac i loc bangwe ge, om he la juda xam piyôp. ⁸Léc a ob nêl vô xam bê xe ti, me angela lag kisiinê ti obêc nêl xolac vô xam so xolac wê xe nêl vô xam ilage, od xomxo tige obêc kô myaviwen nipaên. ⁹A nêl pyap vô xam di a ob nêl i tii vac vô xam bê xomxo ti obêc nêl xolac vô xam, léc o nêl xolac tiyi xochê xolac wê xam ngô mi vông i vin ilage lêm ge, od xomxo tige obêc kô myaviwen lec nipaên wê i vông ge.

¹⁰Kiyang wê a nêl ga, a nêl ên a nêb xomxo i yê a nivihâ, me a nêb Anutu i yê a nivihâ? A o vông ên a nêb xomxo i pimil a lêm. Ên a obêc nêb xomxo i pimil a ge od o tiyi wê a ob tu Kilisi nu yuac ti ge lêm.

Pol nêl i yuac sinale kitong

¹¹Xam lige, a ob nêl kitong vô xam bê xolac wê a nêl vô xam ilage, kehe o yêp vô xomxo kibun ga ti lêm. ¹²Ên a o ngô vô xomxo ti lêm, di xomxo ti o nêl kitong vô a lêm. Nge, Yesu Kîlisi vaci nêl kitong vô a.

¹³Xam ngô mi xovô lec môp wê a vông ilage. Ên buc wê a timu vô Yuda vông môp ge, od a vông vevac vô Anutu nue vông vinên ên a nêb a ob kitya he vêl. ¹⁴Di a vông nilôg la diluhu vô buge Yuda vông môp ên a nêb a ob timu vô môp wê he mi vông ge vihati, om a timu vô buge môp luu lige wê xe xôn lig tiyima ge vêl.

¹⁵A môp bêge, mêlêc buc wê a gên dô vac tag xêyaa ge, od Anutu nêb ob vông nivihia vô a, om vînoo a pyap ên nêb a tu i nu yuac ti. Mêgem buc wê Anutu vaci xovô ge ¹⁶od hîlung nu tuc Yesu vô a ên nêb a la nêl Yesu xolac kitong vô tibii madiluhu wê o Yuda lêm ge. Lêc buc tige, a o la kinêg xolac kehe vô xomxo ti lêm, ¹⁷di a o la Jelusalem vô sinale wê vông xolac tax ge ti lêm. Nge, a la dô vîgwe Alebia, nang dêc lôm la vîgwe Damaskas.

¹⁸A dô klîsmas yon lam la vêl di a lec mi la Jelusalem ên a nêb a ob la xê Pita, om a la dô hîxôn i da yuu, ¹⁹di a o xê sinale baba hîxôn lêm. Jems tibed wê il Apumtau Yesu li tîmuên ti ge, a xê i manôn. ²⁰Kiyang wê a kivuu ga, o kiyang kityooên lêm. Nge, a le vô Anutu manôn di nêl kiyang nôn vô xam.

²¹Nang dêc a loc mi la vac vîgwe levac Silia yuu Silisia, ²²om vô buc tige konglegesen toto vac vîgwe Judia ge gên o yê a magnôn lêm. ²³Di he xovô bo tibed wê xomxo mi nêl ên nêbê, “Xomxo ti wê mi vông myavinê vô il ilage ên nêb ob kitya Yesu xolac vêl ge, gwêbaga nêl xolac tyo vô xomxo ên nêb he i vông i vin.” ²⁴He Judia ngô wê Anutu vông nivihia vô a ge om he pimil Anutu.

Pol nêl i yuac kitong vô xomxo levac levac Jelusalem mi he ngô nivihia

2 ¹Klîsmas vîgê yuu di tô mi la yuudiyuu (14) lam la vêl, dêc xii Banabas nêb xii ob lax mi la Jelusalem, om xii kô Taitas hîxôn mi xen la. ²Anutu nêl vô a nêb a la Jelusalem om a la. A mîla dô hîxôn he Yuda levac vaci di nêl xolac wê a la vông vô tibii wê o Yuda lêm ge kitong vô he. A nêl kitong vô he ên a nêb he i ngô di tyuc lec, êdêc yuac wê a vông ilage di vông gwêbaga hîxôn ge nôn i o ma lêm. ³Om he tyuc lec yuac wê a la vông ge, di Taitas wê lam hîxôn xii ge, ge tibii Glik ti, lêc he o nêl nêb i gôl ninivi tiyi môp wê Yuda mi vông ge lêm. ⁴Vixôhîlôg, xomxo ya nêb Taitas i gôl ninivi lê, lêc he ge xomxo kityooên wê lam dô vac xe mahîgun ên nêb he ob yê xe xôn ên pilepac môp nivihia wê xe dô vac ge i vô nîpaên. Ên Yesu Kîlisi piwelac il vêl ên Yuda vông môp wê ku il xôn ge di vông il dô nidviha, lêc xomxo tigege nêb ob vông il lax mi la

vac Yuda vông môt i tii vac, tiyi xocbê ob vông il lax dô vac kalabuhu ge. ⁵He nêl bêge lê, léc xe o tyuc lec kiyang wê he nêl ge lêm, ên xe nêbê kiyang nôn wê yêp vac xolac ge i yêp luta vô xam.

⁶Mêd he Yuda levac ngô a kiyang léc nêb ge pyap, di he o nêl kiyang ba ya hixôn vô a lêm. Xomxo tigege he lê levac, léc a xê he tiyi xocbê he o lê levac lêm, ên Anutu yê xomxo vihati tiyima. ⁷Xomxo levac tigege o nêl kiyang ya vô a hixôn lêm, ên he xovô ên he nêbê Anutu vông a la ên nêb a la nêl xolac vô tibii wê o Yuda lêm ge i tiyi xocbê nêl vô Pita nêb i nêl xolac vô xomxo Yuda ge. ⁸He xovô bêge, ên xêkizêc wê Anutu vông ge ngidu a xôn di a la nêl xolac vô tibii ba, tiyi xocbê ngidu Pita xôn di i nêl xolac vô he Yuda ge. ⁹Mêgem xomxo levac yon, Jems yuu Pita di Jon, yon xovô ên nêbê Anutu vông yuac tige vô a, mêgem yon pul xii Banabas vigêm hixôn xêyaa nivaha, di xe xôn hîlu kiyang ên xe nêbê xe xôn ob vông yuac xolac, léc xii Banabas ob la vô tibii ba, di yon ob dô hixôn he Yuda. ¹⁰Lêc yon nêl kiyang ti vô xii bêga ên nêbê xii ngidu he lie vông vinên wê nêl susu maên ge xôn. Môt tibêge wê a xê nivaha om a vông nilôg la diluhu vô yuac tibêge.

Pol nêl Pita nêl soên kitong

¹¹Buc wê Pita la dô Antiok ge, od a kunac i di nêl i nêl soên vô i manôn. ¹²Pita vông môt bêga, wê dô Antiok ge od mi la vô tibii vông vinên wê o Yuda lêm ge mi la mi ya hixôn he, léc Jems lie vông vinên ya mîla Antiok om Pita xona ên he, ên he nêl ên he nêbê tibii wê o Yuda lêm ge he i gôl ninivi i tiyi xocbê he Yuda ge. Pita xona ên he, om sea môt wê la mi ya hixôn tibii vông vinên wê o Yuda lêm ge. ¹³Mêd Yuda vông vinên wê dô Antiok ge, Pita didii he mi la vac môt tige dêc Banabas la hixôn. ¹⁴Mêd a val xê môt wê he vông ge, léc a xovô ên a nêbê he o vông môt ge nivaha tiyi kiyang nôn wê xolac nêl ge lêm, om a nêl vô Pita vac he vihati mahigun ên a nêbê, “Ông ge Yuda ti, léc ông o timu vô môt wê il Yuda vông ge lêm. Nge, ông la vô tibii baba môt. Léc môt wê ông vông gwêbaga, tiyi xocbê ông nêl ên ông nêbê tibii ba i timu vô Yuda vông môt hixôn. Letya nêb ông vông môt tibêge?” A nêl kiyang tibêge vô Pita.

Yuda hixôn tibii ba, Anutu yê he nivaha ên wê he vông i vin Kîlisi ge

¹⁵Vixôhîlôg, il ga xomxo Yuda wê mage buge ge Yuda, di il o tibii ba wê madîluhu ge lêm. ¹⁶Lêc il xovô ên il nêbê môt wê il ob timu vô Moses xolac ge o tiyi wê ob vông il le nivaha vô Anutu manôn ge lêm. Nge, xomxo ti obêc vông i vin Yesu Kîlisi ge, od môt tige Anutu ob yê nêbê i xomxo nivaha. Om il Yuda, il êno vông i vin Yesu Kîlisi ên il nêb Anutu i yê il ên nêb il xomxo nivaha. Di il ob nêl bê Anutu i yê il nivaha lec wê il mi timu vô Moses xolac ge lêm, ên Anutu ob yê xomxo ti nivaha ên wê viac Moses xolac nivaha ge lêm. ¹⁷Il sea Moses xolac di vông i vin Kîlisi

ên il nêb Anutu i yê il nivîha. Lêc môt wê il sea Moses xolac ge vông il dô tiyi xocbê tibii madiluhu wê lungên Moses xolac ge, om il ob nêl bê Kilisi vông il la vac môt nipaên, me? Ma vêl, il ob nêl bêge lêm. ¹⁸A sea Moses xolac ên a xovô ên a nêbê o tiyi wê ob vông a le nivîha vô Anutu manôn ge lêm. Om a obêc lax timu vô Moses xolac tii vac ge od obêc nêl a kitong bê a xomxo nipaên. ¹⁹A o tiyi wê a ob timu vô Moses xolac vihati ge lêm, om xolac tige o tiyi wê ob vông a la dô magviha ge lêm. Mêgem gwêbaga a o dô vac xolac tige kwa ngibi lêm, ên a nêb a ob timu vô Anutu tîbed di vông yuac wê i vông ge. Ge tiyi xocbê a xib lec xax hixôn Kilisi, ²⁰om gwêbaga a o dô magviha ya xêkizêc wê aca va vông ge lêm. Nge, a dô magviha ya xêkizêc wê Kilisi vông ge. Di môt yuu yuac vihati wê a vông mi dô vac gwêbaga, a vông nilôg la diluhu vô Kilisi wê Anutu nu ge, ên Kilisi ge wê xêyaa vin lec a di i yib lec a nêg nipaên. ²¹Om a nêb a ob ngiloo Anutu vizid vêl di lax vac Moses vông xolac i tii vac lêm. Ên Moses xolac obêc vông Anutu yê il nivîha ge, od yibên wê Kilisi yib lec xax ge obêc tiyi xocbê susu pileva.

Kiyang yuu, ngwe lec Moses xolac di ngwe lec vông vinên

3 ¹Xam Galesia, xam piyôp maên! Ên a nêl Yesu Kilisi môt wê lam yib lec xax pola ge kitong vô xam mi xam ngô tiyi xocbê xam wê lec mamnôn ge, lêc bêna lêc xam piyôp vô judajuda? ²Om a ob kinêg kiyang tîbed vô xam bêga bê Myakilôhông Ngibua loc dô vac xam nilôm lec kehe bêna? Mêd loc dô vac xam nilôm ên wê xam timu vô Moses xolac ge, me? Ma vêl, Myakilôhông Ngibua loc dô vac xam nilôm ên wê xam ngô Yesu xolac mi vông i vin ge. ³Lêc mêd xam piyôp ma om xam nêb xam ob timu vô môt tibêge? Ên xêkizêc wê Myakilôhông Ngibua vông ge, ge wê vông xam tu Anutu nue ge, lêcom bêna lêc gwêbaga xam nêb xam ob vông yuac ya xêkizêc wê xaxam va vông ge? ⁴Viyin levac wê xam kô lec vông vinên ge, mêd xam kilê pileva? Lêc a xovô ên a nêbê xam o kilê pileva lêm. ⁵Môt wê Anutu vông Myakilôhông Ngibua lam vô xam di vông do levac vac xam mahigun ge, ge vông lec kehe bêna? Mêd vông ên wê xam timu vô Moses xolac ge, me? Ma vêl, vông ên wê xam ngô Yesu xolac mi vông i vin ge.

⁶Xam xovô lec Eblaham wê kiyang nêl kitong mi i yêp vac xolac bêga nêbê, “Eblaham vông i vin Anutu xêkizêc om Anutu yê vông vinên wê i vông ge di nêl nêb Eblaham ge xomxo nivîha.” ⁷Mêgem xam xovô bêga bê xomxo wê vông i vin Anutu ge, ge wê tu Eblaham nue bue nôn. ⁸Ên ilage Anutu xovô nêbê obêc timuên ge od obêc yê tibii wê o Yuda lêm ge nivîha ên wê he vông i vin Yesu ge, om buc wê kiyang tyo gên o vô nôn lec lêm ge, od Anutu nêl kiyang vô Eblaham tax mi i yêp vac kîpihac xolac bêga ên nêbê, “A obêc vông vizid nivîha vô xomxo kibun ga vihati lec ông.” ⁹Mêgem xomxo vihati wê vông i vin Anutu ge, he ob kô vizid nivîha tiyi xocbê Anutu vông vô Eblaham ilage ên wê vông i vin ge.

¹⁰Lêc xomxo wê xo ên nêb he ob timu vô Moses xolac êdêc dô maviha ge od he ob tulec myaviwen nipaên, ên kiyang yêp vac Moses xolac bêga ên nêbê, “Xomxo wê o timu vô xolac ga vihati yang mi vông i vô nôn lec lêm ge od he ob yib mi la vac nipaên.” ¹¹Di kiyang ngwe yêp vac xolac bêga ên nêbê, “Xomxo wê vông i vin Anutu ge, ge wê Anutu ob yê ên nêb he xomxo nivihã wê ob dô maviha.” Mêgem kiyang tige ob vông xovôên vô il bêga bê Anutu o yê xomxo nivihã ên wê he timu vô Moses xolac ge lêm. ¹²Ên môp wê xomxo timu vô Moses xolac ge, di ngwe wê xomxo vông i vin Kilisi ge, yuu xôn o tiyima lêm. Ên kiyang yêp vac xolac bêga ên nêbê, “Xomxo ti obêc viac Moses xolac vihati nivihã ge od obêc la dô maviha.”

¹³Moses xolac nêl kitong nêbê il ob kô myaviwen lec nipaên wê il vông ge. Mêlêc Kilisi vô il vêl ên myaviwen tige, ên ici va kô myaviwen nipaên wê il vông ge, tiyi xocbê kiyang wê yêp vac Moses xolac bêga nêbê, “Xomxo wê yux lec xax ge, ge wê kô myaviwen nipaên vô Anutu.” ¹⁴Anutu vông bêge, ên nêb vizid nivihã wê hilu vô Eblaham ge i vô nôn lec vô tibii ba hixôn ên wê he vông i vin Yesu Kilisi ge, di nêl ên nêb Myakilôhô Ngibua wê Anutu nêb ob vông i lam ge, i lam dô hixôn il ên wê il vông i vin ge.

Moses xolac o tiyi wê ob kitya Anutu kiyang wê hilu vô Eblaham ge vêl lêm

¹⁵Xam lige, kiyang wê a ob nêl ga, a ob tixuu lec il kibun ga vông môp, xocbê xomxo ngwe obêc hilu kiyang vô xomxo ngwe di yuu xôn lee yuu di kivuu lec kipihac mi i yêp ge od xomxo ti o tiyi wê ob pwoo kiyang tige vac, me kivuu kiyang ya hixôn ge lêm. ¹⁶Kiyang tige tiyi xocbê Anutu hilu vô Eblaham ên nêb ob vông vô i hixôn i bue timuên ti ge. Kiyang tige, Anutu o nêl ên nêb ob vông vô Eblaham bue vihati lêm. Nge, ob vông vô bu timuên tived. Ge nêl lec Yesu Kilisi. ¹⁷Mêgem kiyang wê a nêl lec xomxo yuu wê hilu kiyang ge, kehe bêga nêbê Anutu hilu kiyang vô Eblaham ilage ên nêb obêc vô nôn lec timuên. Pyap mêd klismas tibeac hiwocên xocbê 430 ge lam la vêl di Anutu vông xolac vô Moses timuên. Om xolac wê Anutu vông vô Moses ge o tiyi wê ob kitya kiyang wê Anutu hilu vô Eblaham ge vêl ge lêm. ¹⁸Ên vizid nivihã wê Anutu hilu pyap nêb ob vông ge, Anutu obêc vông vô xomxo ên wê he timu vô Moses xolac ge od obêc kitya kiyang wê Anutu hilu vô Eblaham ge vêl. Lêc o bêge lêm, ên vizid wê Anutu nêb ob vông ge, Anutu vông i tiyi kiyang wê hilu vô Eblaham ge.

Yuac wê Moses xolac vông ge

¹⁹Mêgem Anutu vông xolac vô Moses, kehe lec vatya? Kehe bêga nêbê Anutu hilu kiyang vô Eblaham pyap, dêc vông xolac vô Moses hixôn

timuên, ên nêb xolac i hilung xomxo nêb nipaên i yêp seac. Om Anutu nêl ên nêb Moses vông xolac i yêp di i miloc vô buc wê Eblaham bu tyo obêc val lec ge. Xomxo tige wê Anutu hilu kiyang vô Eblaham ên nêb obêc vông i lam ge. Moses xolac tige, Anutu vaci o nêl vô xomxo lêm. Nge, Anutu vông angela lam nêl xolac tige vô Moses, pyap dêc Moses lam nêl vô he Islel. ²⁰Dom kiyang wê Anutu hilu vô Eblaham ge, xomxo ti o kô kiyang tige mi la nêl lêm. Nge, Anutu vaci tived wê nêl i kiyang.

²¹Om Moses xolac ob vông vevac vô kiyang wê Anutu hilu pyap ge, me? Ma vêl. Ên Moses xolac obêc vông il dô madviha ge od Anutu obêc yê il nêb il xomxo nivihia ên wê il timu vô xolac tige. ²²Lêc o bêge lêm, ên xolac nêl bêga nêbê nipaên hivun xomxo vihati xôn tiyi xocbê he dô vac kalabuhu ge. Môm yêp bêge, ên Anutu nêb xomxo obêc vông i vin Yesu Kilisi ge od ob kô nôn nivihia wê Anutu hilu pyap nêb obêc vông vô he wê vông vinên ge.

²³Lêc buc wê kiyang vông vinên gên o val lêm ge, om Moses xolac ku il xôn tiyi xocbê il dô vac kalabuhu ge, di i val vô buc wê kiyang vông vinên val le seac pyap. ²⁴Mêgem yuac wê Moses xolac vông ge bêga nêbê yê il xôn di didii il mi la vô Kilisi ên nêb Anutu i yê il nivihia ên wê il vông i vin Kilisi ge. ²⁵Gwêbaga buc wê il ob vông i vin Kilisi ge val pyap om il ob dô vac Moses xolac kwa ngibi di i viac il i tii vac nang lêm.

²⁶Xam vihati tu Anutu nue pyap ên wê xam vông i vin Yesu Kilisi ge. ²⁷Di xam lipac mia lec Kilisi lê om xam xôn Kilisi tiyima. ²⁸Di xam vihati tu nôn tived ên wê xam vông i vin Yesu Kilisi ge. Om il ob xê il i tiyi xocbê kidu kidu lêm, xocbê Yuda yuu tibii ba, di xomxo pileva yuu xomxo wê lê levac ge, di vêx yuu vux toto ge lêm. Ên il vihati ga, il tiyima. ²⁹Xam tu Kilisi xe, mêgem xam tiyi xocbê Eblaham nue bue wê xam obêc kô vizid nivihia wê Anutu hilu vô Eblaham ge.

Il tu Anutu nue nôn

4 ¹Kiyang wê a ob nêl ge bêga bê xomxo ti ma obêc nêl i lê lec susu vihati pyap, lêc xomxo tyo gên dô nipwo ge od ob dô tiyi xocbê xomxo yuac ti, ²di ob dô vac xomxo ngwe kwa ngibi di he i viac i hixôn susu vihati wê ma nêl i lê lec ge di i miloc vô buc wê ma tung ge. ³Di il ga, il tiyi lec bêge. Ên ilage il dô tiyi xocbê xomxo wê gên nipwo ge, ên il dô vac môm yuu xovôên kibun ga kwa ngibi. ⁴Lêc buc wê Anutu vînoo pyap ge om vông nu tuc lam kibun mi vêx ti kô i di i timu vô Moses vông xolac, ⁵ên nêb ob piwelac il vêl ên Moses xolac wê ku il xôn ge di vông il tu Anutu nue.

⁶Il tu Anutu nue pyap, mêgem Anutu vông Myakilôhô Ngibua wê nu Yesu vông ge lam dô vac il nilôd om il keac ên il nêbê, “Mag.” ⁷Mêgem xam xovô bêga bê xam ob tu nue yuac tii vac nang lêm. Ên xam tu Anutu nue nôn, om xam ob kô vizid wê Anutu nêl i nue lê lec ge.

Tibii Galesia vông Pol nilô vô viyin

⁸Vô buc ilage, xam lungên Anutu om xam dô vac anutu mayibên wê nôn maên ge kwa ngibi. ⁹Lêc gwêbaga xam xovô Anutu pyap, me a ob nêl ngwe hixôn bêga bê Anutu xovô xam pyap. Lêc bêna lêc xam vông xam lax vac môm wê nôn maên di o xêkizêc lêm ge? Xam nêb xam ob lax mi la vac kalabuhu i tii vac nang, me? ¹⁰Ên xam pîmil buc levac yuu da dêc dentuc paha yuu kliskas paha ên xam nêbê Anutu i yê xam nêb xam xomxo nivîha. ¹¹Om a xo xam di a nilôg viyin, ên a nêb mêd yuac levac wê a vông vac xam mahigun ge, mêd a vông pileva di nôn ma.

¹²Xam lige, a o dô vac Moses xolac kwa ngibi lêm, om a kitaa xam bê xam dô i tiyi xocbê a dô ge. Ên ilage a dô tiyi xocbê xam dô ge. Ilage xam o vông nipaên ti vô a lêm. ¹³Ên xam xovô pyap ên xam nêbê ilage yidac vông a di a o tiyi wê a ob la tup vac vigwe ge lêm, om a dô hixôn xam di vông xolac vô xam taxlee. ¹⁴Mêd yidac tige vông yuac levac vô xam, lêc xam o xona ên a lêm, di xam o vô nimim vô a lêm. Nge, xam kô a lec nivîha tiyi xocbê xam kô angela ti lec, me xam kô Yesu Kilisi vaci lec ge. ¹⁵Lêc gwêbaga xam xêmyaa nivîha tyo yêp gê tina? Vixôhilôg, a xovô ên a nêbê ilage xam xêmyaa vin lec a luu vêl, om xam vông xam nilôm la yadiluhu vô a. ¹⁶Lêc gwêbaga, mêd xam wê a nipaên ên wê a nêl kiyang nôn vô xam ge, me?

¹⁷Xomxo ya la pîmil xam di nêl kiyang nivîha vô xam ên nêbê xam vông i vin he vya, lêc he o vông hixôn nilô nivîha lêm. Nge, he nêb he ob vô xam vêl ên a, ên xam pîmil heche va. ¹⁸Vixôhilôg, môm wê xomxo ob pîmil xam di nêl kiyang nivîha vô xam ge, he obêc vông hixôn nilô nivîha ge od obêc nivîha, tiyi wê he ob vông lec buc vihati, buc wê a dô hixôn xam ge di buc wê a dô hixônên xam ma ge. ¹⁹Xam nuge, xam vông a nilôg vô viyin levac nang, tiyi xocbê vêx ti wê nu ob yubac ge om dô vac viyin ge. Om a ob kilê viyin tige di i loc tyip lec buc wê xam obêc vông xam la diluhu vô Kilisi ge. ²⁰Xame, a obêc dô hixôn xam ge od a ob nêl kiyang bôbac wê ob vô nivîha vô xam ge, lêc a o dô hixôn xam lêm, om a nilôg xo kiyang tibeac ên a nêb a ob ngidu xam xôn ya vatya?

Kiyang pilepacên lec Hega yuu Sela

²¹Om xam wê xam nêb xam ob dô vac Moses xolac kwa ngibi ge, xam nêl lê. Xam xovô kiyang wê xolac tige nêl ge, me? ²²Ên kiyang yêp vac Moses xolac bêga nêbê Eblaham nu yuu, lêc vêx wê vông yuac vô Eblaham ge lê nêbê Hega kô ngwe, di vinê Sela kô ngwe. ²³Om nu ngwe wê vêx yuac kô ge, kô i tiyi xovôên wê xomxo vông ge, di nu ngwe wê vinê Sela kô ge, kô i tiyi kiyang wê Anutu hîlu vô Eblaham ge. ²⁴⁻²⁵Kiyang ga, kiyang pilepacên lec vêx yuu ge. Ên vêx yuu ge tixuu lec kiyang yuu wê Anutu hîlu vô xomxo ge. Om vêx ngwe wê Hega ge, tiyi

xocbê kiyang ngwe wê Anutu vông vô Moses lec kitôn Sainai vac vigwe Alebia ge, om Hega nu ge wê ob vông yuac pileva vô xomxo ge. Hega ge tiyi xocbê vigwe Jerusalem gwêbaga, ên xomxo Jerusalem dô vac Moses xolac kwa ngibi tiyi xocbê he tu tibii yuac pileva ge. ²⁶Di vêx ngwe wê Sela ge tiyi xocbê Jerusalem paha ngwe wê yêp kisii ganê. Il dô nidviha di il o dô tiyi xocbê tibii yuac pileva ge lêm, om Sela ge tiyi il tag. ²⁷Tiyi xocbê kiyang wê yêp vac xolac bêga ên nêbê,

“Ông vêx wê ông o kô nipwo ti lêm ge, ông xêmyaa i vô niviha. Di ông vêx wê ông o yaxên myavinê wê nipwo kê ông ge lêm, ông pimil di vô didun hixôn xêmyaa niviha. Ên ông vêx wê ông le môô ge, nume obêc tibeac luu vêx wê dô hixôn liya ge nue vêl.” Xolac nêl bêge.

²⁸Xam lige, xam tiyi xocbê Aisak wê ta Sela kô i tiyi kiyang wê Anutu hilu ge, ên xam tu Anutu nue tiyi xocbê kiyang wê hilu pyap ên nêb ob vô nôn lec ge. ²⁹Lêc Hega nu Ismael wê ta kô i tiyi xovôên wê xomxo kibun ga vông ge, vông vevac vô Sela nu Aisak wê ta kô i tiyi xocbê kiyang wê Myakilôhô Ngibua nêl ge. Mêd môp tibêge yêp gwêbaga hixôn. ³⁰Mêlêc xolac nêl bêna lec kiyang tige? Kiyang yêp bêga nêbê,

“Tii vêx yuac tige yuu nu i loc vêl, ên vêx yuac tige nu lê ob lec susu wê ma Eblaham vông ge ti lêm. Nge, Sela nu Aisak lê ob lec susu wê Eblaham vông ge.”

³¹Om xam lige, il ob xovô bê il o tiyi xocbê vêx wê vông yuac pileva ge nue lêm. Nge, il tu vêx wê Eblaham vinê bôbac ge nue.

Kilisi piwelac il vêl pyap om il ob viac nêd môp i niviha

5 ¹Kilisi piwelac il vêl ên Moses xolac ên nêb il o dô vac kwa ngibi i tii vac lêm. Mêgem xam le pilihi, di le i lêc vông xomxo i lii viyin lec xam i tii vac lêm.

²Xam ngô lê. A, Pol, a ob nêl vô xam bê xam obêc nêb xomxo i gôl xam nimnivi ge od yuac wê Kilisi vông ge ob vô niviha vô xam lêm. Ma vêl.

³Om a ob nêl vô xam i tii vac bê xam obêc tyuc lec ên xam nêb xomxo i gôl xam nimnivi i tiyi xocbê kiyang wê yêp vac Moses xolac ge, od kiyang yêp bêga nêbê xam lêc timu vô môp wê Moses xolac nêl ge vihati hixôn.

⁴Lêc xam wê xam nêb xam ob timu vô Moses xolac ên Anutu i yê xam niviha ge, ge xam tax xam tip vêl ên Kilisi di vô xam vêl ên vizid wê Anutu vông ge. ⁵Lêc il ga, il vông i vin ya xêkizêc wê Myakilôhô Ngibua vông ge, om il dô bin wê Anutu ob yê il nêb il xomxo niviha ge. ⁶Om il wê il vông i vin Yesu Kilisi ge, il ob xê môp ninivi gôlên yuu môp ninivi gôlên maên i tiyi xocbê susu pileva. Ên môp wê nôn ge bêga nêbê vông vinên wê il vông ge ob vô nôn niviha bêga bê il xêdyaa i vin lecma.

⁷Xame, ilage xam dô nimviha vac môp vông vinên. Lêc gwêbaga kiyang tina wê le vac xam xôn di vông xam sea kiyang nônê? ⁸Piyôp

tibêge o lam vô Anutu lêm, ên Anutu ge wê tyuc xam nêb xam tu i nue. ⁹Yis nipwo tya tiyi wê ob vông blet vuac mi vô levac ge, tiyi xocbê kiyang kityooên wê xomxo ti nêl ge obêc vô levac di hivun xomxo vihati xôn. ¹⁰Lêc a vông i vin ên a nêbê Apumtau obêc ngidu xam xôn di xam ob vông i vin kiyang wê a nêl ga, di kiyang ba ge, xam ob sea i loc yêp xel. Di xomxo ti wê loc juda xam piyôp ge, a lungên, ge xomxo levac me xomxo pileva, lêc a ob nêl bêga bê obêc kô myaviwen lec nên nipaên wê i vông ge.

¹¹Xam lige, a obêc nêl vô xomxo bê he i gôl ninivi ge od he Yuda obêc vông viyin ti vô a lêm. Ên a obêc nêl bê he i gôl ninivi ge od kiyang wê a nêl lec wê Yesu yib lec xax ge ob vông he yê a nipaên lêm. Lêc kiyang tige o tibêge lêm, om he yê a nipaên di vông viyin vô a. ¹²Om xomxo wê loc juda xam piyôp ge, a nêb he i loc gôl ninivi vihati vêl.

¹³Xam lige, vixôhilôg, Anutu piwelac xam vêl ên xolac wê Moses ge di vông xam dô nimviha. Lêc xam o lêc xo bêga bê, “Gwêbaga xe dô vac nivihia di kiyang ti o hôm xe xôn lêm, om xe ob vông môt vaxvax i tiyi xocbê xovôên wê xe vông ge”, xam o lêc xo kiyang tibêge lêm. Xam xêmyaa i vin lec lime vihati di xam vông môt wê ob ngidu he xôn ge. ¹⁴Ên xolac vihati yang wê Anutu nêl vô Moses ge, kehe levac tived bêga nêbê, “Ông xêmyaa i vin lec xomxo vihati i tiyi xocbê ông xêmyaa vin lec ôcông va ge.” ¹⁵Lêc xam xêmyaa obêc vô myavinê vôma di xam vông nipaên vôma ge od xam xona nêm, ên xam obêc kitya xam vihati vêl.

Môt wê Myakilôhông Ngibua vông ge hixôn môt nipaên wê xomxo nilô xovô ge

¹⁶Mêgem a ob nêl vô xam bê xam timu vô môt wê Myakilôhông Ngibua vông ge, di xam o lêc timu vô môt nipaên wê xacxam va xovô ên nêb xam ob vông ge lêm. ¹⁷Ên môt nipaên wê xomxo nilô xovô ge vông vevac vô Myakilôhông Ngibua, di môt wê Myakilôhông Ngibua nêb il vông ge vông vevac vô môt nipaên wê xomxo xovô ge, om yuu vông vevac vôma, om môt wê xam nêb xam ob vông ge, xam o tiyi wê xam ob vông ge lêm. ¹⁸Lêc xam obêc dô vac môt wê Myakilôhông Ngibua vông ge od xam ob dô vac Moses xolac kwa ngibi lêm.

¹⁹Xam xovô pyap bê môt nipaên wê xomxo vaci xovô ge yêp bêga nêbê yôdac vêx yuu vux, nilô ngaên yôdac vêx yuu vux, di vông yôdac vaxvax, ²⁰di vông nilô la vô anutu kityooên, di vông yevac, di xêyaa vô nipaên vôma, di vông vevac vôma, di yetac ên xomxo ngwe susu, di kunacma, di vông môt wê ob vô nivihia vô heche va ge, di yêma nipaên mi dô kidu kidu, ²¹di yêma tiyiên ma, di num levac mi vô mavmav di yoo di vông lilo yacyac, di vông môt nipaên toto ge tibeac hixôn. A nêl vô xam ilage di a ob nêl vô xam gwêbaga i tii vac nang bê xomxo wê mi vông môt nipaên tibêge ge ob la dô hixôn Anutu vac i ben lêm.

²²Dom môt wê Myakilôhô Ngibua vông ge ob vô nôn lec bêga bê môt xêyaa vin lec maên, di xêyaa nivihã, di kiyang malehe, di vông nivihã vac nipaên, di vông nivihã vô xomxo mi ngidu he xôn, di timu vô môt nivihã tiyi buc vihati, ²³di nêl kiyang malehe vô xomxo, di viac he nivihã ên môt nipaên vihati. Môt nivihã tibêgee, kiyang ti o vibu môt tibêgee lêm. ²⁴Il wê il tu Yesu Kilisi xe ge, il hi nilôd yuu xovôên nipaên wê kidu il ge lec xax pola mi i yib mi la vêl.

²⁵Myakilôhô Ngibua vông il dô madvihã, mêgem il ob timu vô môt wê Myakilôhô Ngibua vaci vông ge. ²⁶Om il ob yong icil va lêd lêm, di il ob vông lige ni i nyag vô il lêm, di il ob xê lige ngwe nipaên lec he susu lêm.

Il ob ngidu lige wê kilê viyin ge xôn

6 ¹Xam lige, lime vông vinên ti obêc vông môt nipaên ti ge od xam wê xam mi timu vô môt wê Myakilôhô Ngibua vông ge, xam lum nêl kiyang malehe vô i di kô i mi lôm vac môt nivihã. Di xam toto ge, xam xona nêl, ên Seten i o lêc didii xam vac môt nipaên hixôn lêm. ²Di viyin obêc tulec lime ti ge od xam kilê viyin hixôn i, ên môt tibêge wê ob vông Kilisi xolac vô nôn lec. ³Xomxo ti obêc yong i nêb i xomxo levac ge od ge kityoo nêl, ên i o xomxo levac lêm. ⁴Om xomxo toto ge he i yaxên môt yuu yuac wê he vông ge bê nivihã me nipaên. Ên obêc vông bêge ge od he xêyaa ob vô nivihã lec yuac nivihã wê he toto vông ge, di he ob tixuu môt wê he vông ge lec môt wê xomxo ya vông ge lêm. ⁵Ên il toto ge vihati, Anutu obêc yaxên yuac wê il vông ge.

⁶Om xomxo wê mi nêl xolac vô xam ge, xam vông susu nivihã wê xam vông ge ya vô he ên i ngidu he xôn.

⁷Xam o lêc xo bê xam ob kityoo Anutu lêm. Ên xomxo ti o tiyi wê ob kityoo Anutu ge lêm. Ên xomxo obêc xin vê ge od ob kô nôn i tiyi vê wê xin ge. ⁸Om xomxo ti obêc timu vô môt nipaên wê ici va xovô ge od ob kô nôn nipaên bêga nêbê obêc yib mi la vac vigwe nipaên, lêc obêc timu vô môt nivihã wê Myakilôhô Ngibua vông ge od obêc kô nôn nivihã wê Myakilôhô Ngibua vông ge bêga nêbê ob la dô mavihã luta lêc luta. ⁹Om il nid ob ma lec môt nivihã wê il ob vông ge lêm. Ên il obêc vông yuac xêkizêc di il nid obêc ma lêm ge od il obêc kô nôn nivihã lec timuên. ¹⁰Mêgem môt obêc yêp wê il ob vông nivihã vô xomxo ge od il ob vông, lêc il ob vông nivihã vô lige vông vinên i luu vêl.

Pol kiyang timuên wê ici va kivuu ya vigê ge

¹¹Xam wê a kiyang wê a kivuu levac levac ga. Ga aca va kivuu ya vigê ge vô

xam. ¹²Om xam ngô lê. Xomxo wê kidu xam nêb xam gôl nimnivi ge, he vông ên he nêb xomxo i pimil he di vông lê levac vô he lec môt kibun ga. He vông bêge, ên he xo ên he nêbê he obêc nêl lec wê Kilisi yib lec

xax pola ge od tibii obêc vông vîyin vô he. ¹³Xomxo tigeê gôl he ninivi lê, lêc he o timu vô môp vihati wê Yuda vông ge lêm. Lêc he nêb he ob gôl xam nimnivi, ên kô lê levac lec wê xam vông i vin he vya đi gôl nimnivi ge. ¹⁴Đi a ga, a ob yong a lec kiyang tived bêga nêbê il Apumtau Yesu Kîlisi yib lec xax pola, om ge tiyi xocbê môp yuu xovôên kibun ga yib lec xax hixôn, om ti o tiyi wê ob ku a xôn ge lêm, đi a êno xê môp tige tiyi xocbê susu mayibên ge. ¹⁵Om môp ninivi gôlên yuu ninivi gôlên maên, yuu xôn susu pileva, lêc kiyang tived wê nôn ge bêga nêbê Anutu vông il vô paha lec. ¹⁶Om xam wê xam vông i vin kiyang tiga ge, kiyang malehe yuu xêyaa vin lecên i hivun xam xôn, hixôn he Islele wê Anutu nue nôn ge.

¹⁷Om xomxo ti i o lêc vông vîyin vô a lec kiyang tige i tii vac lêm, ên vîyin wê xomxo vông vô a lec Yesu lê ge, piyaha yêp lec a nignivi pyap.

¹⁸Xam lige, vizid nivîha yuu xêyaa vin lecên wê il Apumtau Yesu Kîlisi vông ge i viac xam. Kiyang nôn.